

REGLUGERÐ

fyrir Frjálsa lífeyrissjóðinn.

1. gr.

Heiti sjóðsins er Frjálsi lífeyrissjóðurinn. Heimili hans og varnarþing er í Reykjavík.

2. gr.

Hlutverk sjóðsins er að taka við iðgjöldum sjóðfélaga og ávaxta þau til þess að tryggja sjóðfélögum og erfingjum þeirra lífeyri samkvæmt þeim reglum sem hér fara á eftir.

3. gr.

Félagar í sjóðnum geta orðið allir einstaklingar er leggja stund á sjálfstæða starfsemi eða eru ekki lögskyldaðir til að vera í öðrum lífeyrissjóðum.

Jafnframt geta einstaklingar, sem lögskylt er að greiða í aðra lífeyrissjóði, greitt viðbótarframlag í Frjálsa lífeyrissjóðinn.

Þeir sem gerast vilja sjóðfélagar skulu afhenda stjórn sjóðsins skriflega inntökubeiðni og felst í henni yfirlýsing um að þeir vilji hlíta samþykktum sjóðsins.

Þeir sem eiga inneign í sjóðnum teljast sjóðfélagar.

4. gr.

Framlag sjóðfélaga í sjóðinn er frjálst en takmarkast þó af gildandi lögum um lágmarksgreiðslur í lífeyrissjóð á hverjum tíma.

Gerist maður sjóðfélagi í Frjálsa lífeyrissjóðnum, sem verið hefur sjóðfélagi í öðrum lífeyrissjóði, er stjórn sjóðsins heimilt að taka við sem eingreiðslu vegna hans því fé er hann fær útborgað úr sjóðnum er hann flyst úr.

5. gr.

Stjórn sjóðsins er heimilt að fenginni skriflegri beiðni einstakra sjóðfélaga að draga af inngreiddum iðgjöldum þeirra upphæð sem svarar til iðgjalds vegna líf- og/eða heilsu-tryggingar hjá viðurkenndu líftryggingafélagi.

6. gr.

Fé það, sem lagt er inn í nafni sjóðfélaga, skal vera séreign hans, tilgreind á sérstökum reikningi.

Nettótekjur sjóðsins skiptast milli sjóðfélaga í hlutfalli við eign hvers um sig og færast árlega á sérreikning þeirra.

7. gr.

Inneignir sjóðfélaga greiðast þannig:

1. Sjóðfélagi, sem orðinn er fullra 60 ára að aldri, á rétt á að fá inneign sína greidda smám saman. Skal miða við að innstæðan verði greidd með jöfnum árlegum greiðslum á eigi skemmri tíma en 10 árum. Sama rétt hefur sjóðfélagi sem verður að hætta störfum vegna varanlegrar heilsubilunar áður en hann nær 60 ára aldri.
2. Deyi sjóðfélagi fellur inneign hans í sjóðnum til erfingja hans og skiptist milli þeirra eftir venjulegum erfðareglum. Hluta barna undir 18 ára aldri ber að skipta með jöfnum greiðslum á 10 ár eða á þau ár sem barnið vantar í 18 ára aldur, hvort sem lengra er. Hluta eftirlifandi maka ber að skipta með jöfnum greiðslum á minnst 10 ár.

Heimilt er stjórn sjóðsins að víkja frá undanfarandi ákvæðum þessarar greinar ef innstæðan er svo lítil að árlegar greiðslur geta ekki náð eftirtöldum upphæðum:

- a. Til sjóðfélagans 125% þess árgjalds sem hann greiddi síðast í sjóðinn.
- b. Til eftirlifandi maka 75% af árgjaldi því sem vísað er til undir a.
- c. Til hvers barns 20% af árgjaldi því sem vísað er til undir a.

Í þeim tilfellum, sem talin eru undir staflidum a-c, má stjórn sjóðsins dreifa greiðslum á skemmri tíma en 10 ár, en þó svo, að árlegar greiðslur fari ekki fram úr þeim upphæðum sem þar eru taldar.

Með jöfnum greiðslum er hér átt við jafnar greiðslur að tiltölu við fjölda greiðsluára þannig að sjóðfélagi fái á hverju ári þann hluta af innstæðu sinni, að meðtöldum tekjum vegna hennar, sem svarar tölu þeirra ára er eftir standa af endurgreiðslutímanum.

8. gr.

Nú gerist sjóðfélagi, sem fer úr þessum sjóði, sjóðfélagi í öðrum lífeyrissjóði, sem stofnaður er með lögum eða nýtur viðurkenningar fjármálaráðuneytisins, eða kaupir sér lífeyri hjá tryggingafélagi eða stofnun sem starfar eftir reglum er fjármálaráðuneytið samþykkir, og er sjóðstjórninni þá heimilt að greiða alla inneign sjóðfélagans í einu lagi. Það er skilyrði þess að greiða megi alla inneignina í einu lagi að hún gangi til kaupa á lífeyrisréttindum fyrir viðkomandi mann í þeim sjóði er hann flyst til eða að henni sé varið til kaupa á lífeyri í tryggingafélagi eða stofnun svo sem að framan greinir. Það skal enn fremur sett sem skilyrði fyrir því að greiða inneignina í einu lagi að tilsvarandi takmarkanir gildi um endurgreiðslur eða endurkaup þar sem réttindi eru keypt eins og eftir þessari reglugerð.

Fé, sem yfirfært kann að hafa verið úr öðrum lífeyrissjóði skv. ákv. 2. mgr. 4. gr., veitir ekki viðtækari endurgreiðslurétt en gildi í sjóðnum sem það var yfirfært úr.

Kostnaður við flutning inneignarinnar telst vera 2%, og greiðist af inneign sjóðfélaga.

9. gr.

Lífeyrissjóðurinn ávaxtar fé sitt með eftirfarandi hætti:

1. Í ríkisvixlum, ríkisskuldabréfum og skuldabréfum sem tryggð eru með ábyrgð ríkissjóðs.
2. Í skuldabréfum bæjar- og sveitarfélaga.
3. Í skuldabréfum tryggðum með veði í fasteign að hámarki 65% af metnu markaðsvirði nema þegar um er að ræða sérhæft atvinnuhúsnæði þá skal það hámark vera 35%.
4. Með innlánnum í bönkum og sparisjóðum.
5. Í skuldabréfum og vixlum banka, sparisjóða og annarra lánastofnana, sem lúta eftirliti bankaeftirlitsins.
6. Í hlutabréfum fyrirtækja sem skráð eru á opinberum verðbréfamarkaði í löndum OECD.
7. Í hlutdeildarskírteinum verðbréfasjóða.
8. Í öðrum verðbréfum, þó að hámarki 10% af eign sjóðsins.
9. Í innlendum hlutabréfum sem ekki eru skráð á skipulegum markaði, enda séu engar hömlur lagðar á viðskipti með hlutabréfin og ársreikningar viðkomandi hlutafélaga öllum aðgengilegir
10. Með gerð afleiða til að draga úr áhættu.

10. gr.

Stjórn sjóðsins skal skipuð fimm mönnum, þremur skipuðum af stjórn Fjárvangs hf. og tveimur kosnum á almennum fundi sjóðfélaga til þriggja ára í senn.

Einn varamaður skal tilnefndur af stjórn Fjárvangs hf. og annar kosinn á almennum fundi sjóðfélaga.

Stjórnarfundir eru því aðeins lögmætir að meirihluti stjórnar sæki fund. Um stjórnarfund, verkaskiptingu stjórnar og önnur störf fer að öðru leyti eftir þeim reglum sem í gildi eru á hverjum tíma samkvæmt samþykktum Fjárvangs hf.

Endurskoðendur Fjárvangs hf. skulu jafnframt vera endurskoðendur sjóðsins en auk þess skal árleg endurskoðun á sjóðnum falin löggiltum endurskoðanda er stjórn sjóðsins skipar í því skyni. Má það vera annar félagsendurskoðendanna, er við getur átt.

11. gr.

Reikningsár sjóðsins er almanaksárið.

Stjórnin semur ársreikninga fyrir lok marsmánaðar næsta árs eftir reikningsárið og leggur þá fyrir endurskoðendur sjóðsins og hinn löggilta endurskoðanda er ljúka skulu athugun þeirra fyrir lok næsta mánaðar. Skulu reikningarnir liggja frammi til athugunar á aðalfundi Fjárvangs hf. á því ári með áritun endurskoðendanna, svo og í skrifstofu sjóðsins til athugunar fyrir sjóðfélaga. Reikningarnir skulu einnig sendir fjármálaráðuneytinu til athugunar.

Hinn löggilti endurskoðandi skal staðfesta með áritun á ársreikningana að reikningar og bókhald sjóðsins, sem þeir eru byggðir á, séu færð eftir viðurkenndum bókhaldsreglum svo og að öll ráðstöfun á fé sjóðsins sé í samræmi við ákvæði reglnanna fyrir sjóðinn. Jafnframt skal í áritun hans felast staðfesting á því, að allar þóknanir og launagreiðslur, svo og bótagreiðslur, er sjóðurinn hefur greitt, hafi verið réttilega gefnar upp til skattafyrivalda.

Fyrir umsjón og starfrækslu sjóðsins greiðir sjóðurinn Fjárvangi hf. þóknun er nemur sem svarar allt að 1% á ári af öllum innstæðum sérreikninga. Stjórn sjóðsins ákveður þóknunina fyrir fram til eins eða fleiri ára í senn. Skal þóknunin reiknuð misserislega og dregin frá innstæðum eða tekjum af þeim áður en þeim er skipt á sérreikninga.

12. gr.

Samþykktum þessum má breyta á almennum fundi sjóðfélaga með 2/3 greiddra atkvæða enda hafi tillögur til breytinga á samþykktum fylgt fundarboði. Atkvæðisréttur sjóðfélaga telst eftir inneign þeirra við næstliðin áramót. Til breytingarinnar þarf jafnframt samþykki stjórnar Fjárvangs hf.

13. gr.

Skýlt er stjórn sjóðsins að boða til almenns fundar sjóðfélaga til breytingar á samþykktum þessum eða til kynningar á högum og starfsemi sjóðsins þegar þess er óskað með skriflegri beiðni sjóðfélaga er ráða yfir 10% af heildarinnstæðum sérreikninga við næstliðin áramót.

14. gr.

Óheimilt er að framselja eða veðsetja inneignir í sjóði þessum, hvort heldur er sem heild eða hluta þeirra, svo sem einstakar útborganir.

15. gr.

Vilji sjóðfélagi eða erfingjar sjóðfélaga ekki hlíta úrskurði sjóðstjórnar um eitthvert atriði varðandi sjóðinn getur hann lagt málið fyrir gerðardóm. Hann skal þá tilkynna sjóðstjórninni það bréflega innan mánaðar eftir að hann fékk úrskurð hennar. Jafnframt skal hann þá tilnefna gerðardómsmann af sinni hálfu. Sjóðstjórninni ber þá að tilnefna gerðar-

dómsmann innan tveggja vikna. Þeir koma sér síðan saman um þriðja mann, en komi þeir sér ekki saman um hann skal hann skipaður af Hæstarétti og er hann formaður dóms þessa. Úrskurður gerðardóms er bindandi fyrir báða aðila og verður ekki áfrýjað.

Með tilvísun til laga nr. 55/1980 staðfestist reglugerð þessi hér með.

Fjármálaráðuneytinu, 30. júní 1998

F. h. r.

Áslaug Guðjónsdóttir.

Margrét Gunnlaugsdóttir.

SAMÞYKKT

um fellingu trjáa í Reykjavík.

1. gr.

Ekki má fella tré sem eru 40 ára eða eldri, eða 4 metrar á hæð eða hærri, nema með leyfi byggingarnefndar.

2. gr.

Um umsóknir um leyfi til trjáfellinga gilda ákvæði 43. gr. skipulags- og byggingarlaga nr. 73/1997, sbr. lög nr. 135/1997 og ákvæði reglugerðar nr. 614/1995.

3. gr.

Ofangreind samþykkt borgarstjórnar Reykjavíkur sem er gerð samkvæmt heimild í 5. mgr. 37. gr. skipulags- og byggingarlaga nr. 73/1997, staðfestist hér með skv. 6. mgr. 37. gr. sömu laga til þess að öðlast gildi þegar í stað.

Umhverfisstjórnuneytinu, 29. júní 1998.

Guðmundur Bjarnason.

Ingimar Sigurðsson.